

# HIT PIRSAIT II IN AFAN-NESAN

## *re' na'uu ma na'baa' anbi*

### *Usif Yesus In Haef ein*

**Nansaa' am es anmui' “Hit Pirsait ii in Afan-Nesan”**

Un-unu' fe'e te, tuaf-tuaf re' nromin he ntoupun asrani' natanan neu sin tua asaksiit ein am nak, “Au 'pirsai 'ak, Yesus Kristus naan, es re' Uisneno In Anah.” Maski anmanaku' on re' naan, mes anmui' rasi mfaun ma huma'-huma' re' anpoi ma nboor neem anmatoom nok atoni' Kristen sin pirsait. Onaim of oni' toon 140 oras Yesus Kristus anmoin naan een, a'naakt ein anbin akrei ji ansusun pirsait ii in afan-nesan, maut he are' tuaf re' nteek sin tuak atoni' Kristen bisa nahiin hit pirsait re' batuur ii, on re' mee. In are' afan-nesan sin ok-oke', sin nait sin na'kon *Uisneno In Suur Akninu'*. Nok ranan naan, bisa nahiin noni' re' ka batuur ein fa gui, on re' mee msa'? A'roo'-roo te, akrei ji na'baba' rasi esa'-nuu. Rarit ankoon antea toon natun nee neiki nsae (600 M ke atas), na' “Hit pirsait ii in afan-nesan” anjair namtiis, namnees on re' hit tpaek je oras ia. Na'ko un-unu' ntea oras ia, atoni' Kristen re' anbin mee-mee, ma na'ko rais pirsait Kristen in taef ein, anpaek nabu-buan uab ein re' ia, he namnaub sin tuak ein kuuk anmatoom nok hit atoni' Kristen hit pirsait.<sup>a</sup>

### **Hit tpirsai saa'?**

<sup>1</sup> Au 'pirsai 'eu *Ama' Uisneno*,

<sup>2</sup> es re' Uisneno akuasat anneis-neis ji,

<sup>3</sup> Amo'et-Apakaet neno tunan ma pah-pinan.

---

<sup>a</sup>Uab ein anbin *Hit Pirsait ii in Afan-Nesan* ka nasuir fa nok saa' re' matu'i ma hit trees tiit et surat *Roma* 15:13, *1 Korintus* 15:3-7, *Filipi* 2:5-11, *1 nai' Timotius* 6:13-14, *2 nai' Timotius* 2:8, 4:1. Nai' Paulus sin na'uab ein amsa' “mutoon ho pirsait aan” et surat *Roma* 6:17, ma *1 nai' Timotius* 6:12. Nai' Petrus anreun kit he ta'nene' piut he tatoon anmatoom nok hit pirsait et *1 nai' Petrus* 3:15.

- <sup>4</sup> Au 'pirsai 'eu *Yesus Kristus*,  
<sup>5</sup> es re' Uisneno In Anah re' fua' mees' aah.  
<sup>6</sup> In re' naan, hit Usi'.  
<sup>7</sup> In ainaf bi Maria na'apu' na'ko Uisneno In Asmaan Akninu',  
<sup>8</sup> maski in ka ntuup niit fa nok atoni'.  
<sup>9</sup> Sin nha'mui' ma na'nuka' Usif Yesus  
 oras gubernur Pontius Pilatus annaa' aprenat.  
<sup>10</sup> Sin nkuus nakfiir' Ee nbi hau nehe.  
<sup>11</sup> In nmaet, rarit sin nsuub naneuk Goe.  
<sup>12</sup> In nsanu nbi bare neu amaets ein.  
<sup>13</sup> Anmeu on naan ate,  
 Kristus anmoni nfain na'ko In a'maten.<sup>b</sup>  
<sup>14</sup> In na'ait On ansae neu sonaf neno tunan,  
<sup>15</sup> rarit antuun On et Uisneno In abnapan a'ne'u,  
 anbi bare re' mahormata' anneis-neis ji.  
<sup>16</sup> Oras In nkoen On anfain neem na'ko nee,  
<sup>17</sup> In of nafeek hukun neu tuaf amonit ma tuaf amates.  
<sup>18</sup> Au 'pirsai 'eu Uisneno In *Asmaan Akninu'*;  
<sup>19</sup> Au 'pirsai 'ak, apirsait ein neu Yesus Kristus  
 etan bare mee-mee ro kninu';  
<sup>20</sup> Au 'pirsai 'ak, apirsait ein neu Yesus Kristus  
 ro he nmonin kninu' nok nekaf mese' ma ansaof mese';  
<sup>21</sup> Au 'pirsai 'ak, Uisneno nnoes nain hit saant am penu sin;  
<sup>22</sup> Au 'pirsai 'ak, of oras Uisneno namonib nafani' kit ate,  
 hit ttoup aof fe'u;  
<sup>23</sup> Au 'pirsai 'ak, Uisneno nfee kit  
 a'monit amneot ma ammonot re' nabar-baar.

Au 'pirsai on re' naan, tua.

<sup>b</sup>13: Anbi uab Yunani, sin nmurai nso'in na'kon: neno ia (= 1), noka' (= 2), anmeu (= 3). Onaim, anbi uab Yunani, τη τρίτη ἡμέρα (*tē tritē hēmera*) “anbi neno no teun ii” in sairt ii anbi uab Amarasi, es re’ “anmeu”. Uab Yunani ἀναστάντα ἀπὸ τῶν νεκρῶν (*anastanta apo tōn nekrōn*), in a'moufn ii anbi uab Amarasi nak, “anmoni nfain na'ko In a'maten”, ka nak fa “anfeen anfain na'ko amaets ein sin sonak ma sin atnaak ein”.